scrito, non achade oratori, ma come a li oratori di 209 quella Comunità venuti in Colegio, quali stanno in questa terra, è stà dito, bisogna *omnino* servano la Signoria di la dita summa in tanto bisogno; sichè non resti a usar ogni diligentia.

Di campo, dil provedador Griti, da Villafranca, come ho scrito, fo letere, di 26, hore 18. Come era venuto li uno trombeta di Verona con una letera di lo episcopo di Trento e Consieri cesarei drizata a monsignor di Lutrech, qual manda a la Signoria con la risposta fattogli. Et andato esso Provedador insieme col Governador da soa excelentia, disse: « Questo toca a vui che si dia risponder ». I quali disseno era bon in questo dirli non si possi condur vituarie in Verona. Et non parse a Lutrech meter questo, ma fo trovato certa forma come si vederà la risposta. Et dito per esso Lutrech: « Questa cosa è di la Signoria; deliberè vui la risposta si ha a far ». Scrive eri avè ducati 4000. Item, li lanzinech erano sublevati, et dubita esso Provedador non esser taià a pezi da loro; i qual hanno posto a sacco le boteghe in piaza, maxime una di uno venitian con malvasie e salumi; sichè si proveda di mandarli danari, perchè dubita non i vengi qualche scandolo; sichè lui Provedador à avuto gran paura. Scrive, non che sia di natura timido, ma ha da far con zente bestial, sichè li ha dato ducati 4000 auti ut supra, et ducati 3000 che avè di Brexa e Bergamo; li qual ducati 7000 con gran faticha li tesorieri li hanno voluti tuor, et voleno ducati 20 milia per tutto Luni, et poi dicono doverano aver 34 milia. Item, li fanti spagnoli è sublevati volendo danari etc. Perlanto, si vede esso Provedador disperato. In Axola sono ducati 1000, in Crema ducati 3000, i qual li ha lasati cussì a ordine di la Signoria nostra. Di Lover non ha auto nulla, di Bergamo sono molto duri. Serive sier Zuan Antonio Justinian provedador a Martinengo, qual si afaticha per trovar qualche danaro. Par domino Alessandro Coion, li ha ditto aver prestà per avanti a la Signoria alcuni danari, li quali non li ha auti, et è contento prestar a la Signoria adesso ducati 2000, qual li farà prestar a soa moier; ma vol aver cauzion sopra do lochi di bergamasca Colorgno et Vignan, zoè sopra l'intrade che dà ducati 300 all'anno fra tuti do lochi; per il che esso Provedador serive è bon la Signoria nostra li mandi una comission zeneral di poter ubligar etc. per la restitution a quelli imprestarano danari al presente.

Et per Colegio li fo risposto esser contenti darli ditti lochi, mandandoli uno mandato amplo di poter ubligar etc.

La letera di lo episcopo di Trento è sotoscrita: Bernardus episcopus, et Consiliarii Cesarei, data in Trento, a di 21, drizata a monsignor di Lutrech. Come hanno auto aviso da la Maestà Cesarea di la conclusion di lo apontamento et paxe fata con la Christianissima Maestà, però li scriveno per saper si esso Lutrech ha auto alcun ordine di levar le ofese etc., perchè cussì loro farano. Et esso Lutrech li rispose come è vero di questa conclusion, et monsignor di Curtavilla di brieve sarà in Verona, a nome dil Catholico re, dal qual si averà ordine di quanto si averà a far.

Achadete ozi a Consejo una cossa notanda, che do zoveni zentilhomeni, hessendo a parlamento, uno di loro disse: « Metemo pegno un ducato che baloterò meio che ti », et cussì messeno pegno, et uno di loro poi disse: « E oltra di questo zuogemo quatro cortelade ». L'altro disse: « Son molto contento. » Et erano compagni carissimi di anni 20 l'uno, i qual sono sier Piero Sagredo di sier Zuan Francesco e sier Nicolò Arimondo di sier Francesco. Et venuti zoso di Consejo, andono per fare a le cortelade, et a Santa Maria Zubenigo a hore una di notte. Il Sagredo dete sopra il zenochio al Arimondo et li fe' gran bota, adeo li venne il spasmo et la notte morite; sichè il Sagredo anderà in bando; e l'un e l'altro ha perso Venezia.

In questa matina, sier Lorenzo Orio dotor e sier Marco Foscari, avogadori extraordinarii, partino di qui, vanno per le Camere justa la commission datoli per Colegio con autorità dil Consejo di X con la zonta, et andono a Padova, prima per veder le raxon di le fabriche in le qual è stà speso e robà assà danari, come è fama.

A dì 28, Domenega. La Signoria fo in chiesia 210 a messa con li do oratori Papa et Ferrara, e il conte Mercurio e li zentilhomeni etiam invitati al pasto dil Doxe, il qual si chiama dil 41; tamen di 41 di questo Doxe non è vivi se non numero..., et fo solum a disnar numero... et compita la messa, si andò a disnar col Doxe qual vene a tavola, et fo bel pranso.

Da poi disnar, fo Colegio di Savii. Meglio era far Gran Consejo; si haria trovato danari, et non perder questa zornata, perchè il Colegio non atende ad altro che trovar danari.

Dil provedador Gradenigo zeneral, date ad Albarè, a dì 27, hore 3 di note. Come havia fato la monstra a domino Troylo Pignatelo, qual è andato a la guarda. Scrive, Cola Moro e li altri contestabeli fanno mal offici, i qual dimandano danari et voriano mandar li soi noncii a la Signoria per danari.

205